



LECTIO PREADOLEXENTE - ADOLEXENTE SIRA BA, HODI HALO MÓS NUNE'E

"Sasukat domin nian mak hadomi lahó sasukat" S. Bernardino

Ema hotu hatene aiknanoik ida ne'e, maibé ohin ita koko atu hakle'an liután hodi komprende saida mak Jezús hakarak dehan kona-ba domin (karidade) ho ninia istória. Pasajen ida ne'e bele fahe ba parte rua: iha parte dahuluk (10,25-29) ita asiste ba diálogu entre Jezús no dotor ukun nian kona-ba oinsá bele he-tan moris rohan laek; iha parte daruak, Jezús haktuir aiknanoik ida atu hatán ba dotor ida ne'e nia pergunta kona-ba maluk sira.




Ita hahú hodi lee pasajen Lk 10,25-37. Hafoin ita sei rona esplikasaun ruma kona-ba fatin no ema sira ne'ebé Jezús temi.

Jerusalem: sidade importante liu iha rai Israel. Iha tempu Jezús nian iha baki boot atu proteje nia, uma sira sei furak no, liuliu, iha Templu atu bele adora Maromak.

Jeriku: sidade ida ne'e dook husi Jerusalem 25/30 km no dalan tun ba metro 1000 (maizumenus husi foho tutun Ariana to'o tasi ibun iha Seisal) no entre sidade rua ne'e iha rai fuik maran. Tan ne'e bandidu no na'okten sira hein iha dalan sira ne'ebé la'o mesak atu aproveita.

Amlulik no levita: sira na'in rua serbí Na'i (levita hanesan diakonu ida), no se sai husi Jerusalem, fatin iha ne'ebé iha Templu, ne'e katak sira iha buat ruma importante atu halo. Atu bele hala'o sira-nia serbisu, sira tenke tuir lei hebreu sira nian, nune'e la bele "sai foer", katak la bele kona raan ka hakbesik ema ida ne'ebé "foer".

Liu daudaun ka liu ba oin: kona-ba hahalok ida ne'e ne'ebé amlulik no levita halo, loloos sira troka dalan hodi kontinua la'o ba oin, maibé iha sorin seluk, nune'e sira la bele kona ema ne'ebé na'okten hakanek.



Maluk: tetun traduz ho liafuan ida ne'e, liafuan ida ne'ebé loloos signifika "ema besik ha'u"; tan ne'e hebreu sira diskute besik ida ne'e katak

sa: iha família laran de'it? Ha'u-nia viziñu sira? Sira ne'ebé hela iha knua hanesan mak "besik"? Tan ne'e, bainhira dotor husu: "Se mak besik ha'u?" Jezús hatán ho pergunta seluk: "Se mak hakbesik ema ne'ebé monu iha na'okten sira nia liman?" Hodi halo dotor komprende katak la bele define kedas se mak "besik", maibé tenke haree "ha'u hakbesik se?".

Tuir mai koko atu prenxe tabela ida ne'e, hodi hakerek asaun ida de'it iha liña ida :

	Amlulik	Levita	Samaritanu
hahalok sira			

Se fó atensaun bele haree katak hahalok uluk nian no daruak (liu, haree nia) hanesan ba ema hotu, hafoin, samaritanu nia hahalok sai la hanesan ho sira na'in rua seluk.

Tuir mai, imi sei hakerek samaritanu nia hahalok sira: imi sei deskobre katak, hodi haktuir istória ida ne'e, Jezús fó atensaun liu ba samaritanu nia hahalok sira, tanba nia hakarak halo ema komprende katak atu hadomi (halo karidade) presiza sai konkretu... de faktu liafuan ne'ebé repete dala barak mak "halo".

Depois de reflesaun ida ne'e, bele halo drama hodi fó atensaun liuliu ba samaritanu nia hahalok sira ne'ebé presiza hatudu fali didi'ak hodi la haluha buat ida.



Nu'udar **empeñu**, preadolexente sira bele halo dezeñu ida hanesan ida ne'ebé iha sorin, no hakerek parente sira, belun sira nst iha kabuar, dook ka besik, konforme relasaun ne'ebé nia iha ho sira. Tuir mai, nia bele haree se mak dook liu no foti empeñu ida atu sai nia maluk (katak "hakbesik" nia).

